



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XI

BROJ: 182

DATUM: 27.06.2014.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja
fax: + 387 33 552 810
dzenita@sogfbih.ba

Sadržaj biltena:

Zaključci sa Vanredne sjednice Predsjedništva Saveza	1
Vlada FBiH o pomoći područjima stradalim u prirodnoj nesreći	1
Vlada FBiH utvrdila Prijedlog zakona o osnivanju Federalnog fonda za pomoć nastradalim područjima od prirodne nesreće na teritoriji FBiH	3
U Vladi FBiH razgovarano o mjerama na sanaciji i obnovi područja pogođenim prirodnom nesrećom	3
Apel za pomoć ugroženom stanovništvu Općine Sapna	4
Općina Centar Sarajevo novčano pomaže poplavljene općine	5
U BiH stiglo 25 kamiona namještaja iz Turske, očekuje se još 75	5
USAID i Ambasada SAD-a obezbjedile 10 mil USD za sanaciju vrtića, škola i podršku zaposlenim	6
Klizišta u Doboj Jugu obišao geolog	6
UNDP uručio dvije pumpe za ispuštanje mulja Općini Doboj Jug	6
Više od 200 klizišta na području općine Žepče	7

Bilten Saveza općina i gradova Federacije Bosne i Hercegovine

ZAKLJUČCI SA VANREDNE SJEDNICE PREDSJEDNIŠTVA SKUPŠTINE SAVEZA ODRŽANE POVODOM STANJA PRIRODNE NESREĆE

Predsjedništvo Skupštine Saveza općina i gradova Federacije je dana 27. maja/svibnja u zgradi Općine Tuzla održalo vanrednu sjednicu povodom stanja prirodne nesreće na teritoriji općina u Federaciji Bosne i Hercegovine.

U vezi sa navedenim, Predsjedništvo Saveza je usvojilo slijedeće zaključke koji su dostavljeni Vladi Federacije Bosne i Hercegovine, te Predstavničkom domu i Domu naroda Parlamenta Federacije Bosne i Hercegovine:

- Predsjedništvo Saveza izražava zahvalnost svima onima, koji su u uvjetima teške prirodne nesreće pružili nesebičnu pomoć ugroženom stanovništvu.

- Predsjedništvo Saveza je konstatovalo

kako su organi općina i gradova uglavnom položili ispit na zaštiti i spašavanju građana ugroženih prirodnom nesrećom, u situaciji kada su uništene velike površine građevinskog i poljoprivrednog zemljišta, teško oštećena komunalna i saobraćajna infrastruktura, uništen veliki broj porodičnih kuća, stanova i pratećih objekata u privatnom vlasništvu, stočni fond, te oštećeni ili uništeni mnogi javni i privredni objekti.

- Predsjedništvo Saveza je konstatovalo kako poseban problem, zbog prirodnih i geoloških karakteristika tla, predstavlja ogroman broj klizišta, za šta je neophodno donijeti i poseban zakon.

- Predlaže se Vladi Federacije Bosne i Hercegovine i Parlamentu Federacije Bosne i Hercegovine, da po hitnom postupku pristupe donošenju posebnog Zakona o ovoj prirodnoj nesreći, koji bi bio u funkciji što efikasnijeg otklanjanja štetnih posljedica uzrokovanih prirodnom nesrećom, usljed masovnih poplava i klizišta, a koju je po prvi put proglasila Vlada FBiH 15.05.2014. godine. Predlaže se da se u čl. 3., 4. i 5. radnog materijala Zakona briše „(alternativa općinsko/gradsko vijeće)“ i da ovaj zakon ostane na snazi jednu godinu dana.

- Predsjedništvo Saveza apeluje na sve potencijalne donatore da pruže pomoć članicama Saveza (ugroženim općinama i gradovima) uplatom sredstava na njihove otvorene podračune (za koje se daje garancija da će se sa istim transparentno raspolagati) ili direktnim finansiranjem radova na sanaciji ili izgradnji porodičnih kuća i stanova, infrastrukture (putevi, vodovod, kanalizacija itd) i



Sa vanredne sjednice Predsjedništva Skupštine Saveza

VLADA FBiH O POMOĆI PODRUČJIMA STRADALIMA U PRIRODNOJ NESREĆI

MOSTAR, 19. juni/lipanj – Na 120. sjednici u Mostaru, Vlada Federacije BiH je, u cilju osiguravanja što više sredstava namijenjenih za pomoć područjima Federacije BiH stradalim u poplavama i klizištima, izmijenila i dopunila nekoliko odluka koje se odnose na programe utroška s kriterijima raspodjele sredstava utvrđenih Budžetom FBiH za 2014. godinu pojedinim federalnim ministarstvima.

Na ovaj način realizira se zaključak Vlade od 23. maja/svibnja 2014. godine, a u skladu s izmjenama i dopunama ovogodišnjeg Budžeta FBiH, bilo je potrebno revidirati program rada federalnih ministarstava, te optimalno preraspodijeliti sredstva.

Danas su donesene i druge odluke s istim ciljem - što bržeg saniranja posljedica poplava i pomoći stanovništvu, privredi i poljoprivredi u oporavku od katastrofalnih posljedica prirodne nesreće.

Za saniranje stambenih objekata: Pomoć od oko 5.000.000 KM

Turska Općina Karamursel se uključila u pružanje pomoći poplavljenim područjima u BiH

7

Pomoć iz UAE za poplavljena područja

8

U Ze-do kantonu evakuisano 7.877 osoba sa štetom od 500 mil KM

8

Vlada ZDK pomaže općine sa 410.000 KM

9

Djelatnici vatrogasne postrojbe Kiseljak i Kreševo boravili u Odžaku

9

Projekat Fonda otvorenog društva i Općine Zenica u saniranju šteta od poplava i klizišta

9

Devet općina dobija 1,3 mil.€ iz IPA fondova za jačanje konkurentnosti malih i srednjih preduzeća

10

Švedska šalje pomoć na Balkan od 400 mil. €

11

Ustavni sud FBiH presudio u korist općina Vareš i Olovo

11

Općina Goražde opravdala certifikat ISO 9001-2008

11

Pomoć povratnicima u Jajce

12

Otvorena nova zgrada Općine Gornji Vakuf-Uskoplje

12

Visoko dobija rezidencijalno naselje na 40.000m²

13

Delegacija turske Općine Serdijan boravila u Brezi

13

Jablanica uvela video nadzor i bežični internet u užem gradskom jezgru

14

Održan prvi sastanak Radne grupe za energetska efikasnost Saveza

14

Najava obilježavanja dana općina za mjesec juli/srpanj

15

Vlada FBiH donijela je danas Odluku o izdvajanju dijela sredstava u ukupnom iznosu od oko 5.000.000 KM, na ime pomoći područjima pogođenim elementarnim nepogodama. Sredstva se izdvajaju sa ekonomskog koda „Tekući transferi područjima pogođenim elementarnim nepogodama“, a namijenjena su kao pomoć građanima u 36 općina Federacije BiH kojima su, usljed prirodne nesreće, potpuno uništeni ili su im oštećeni stambeni objekti.

Općine, kao krajnji korisnici sredstava, dužne su da, u skladu sa Zakonom o izvršavanju budžeta Federacije Bosne i Hercegovine za 2014. godinu, u roku od 60 dana od dana uplate sredstava, dostave Vladi Federacije Bosne i Hercegovine izvještaj o načinu korištenja sredstava.

Federalno ministarstvo raseljenih osoba i izbjeglica: Za pomoć 6.800.000 KM

Izmijenjenom Odlukom o usvajanju Programa utroška sredstava Federalnog ministarstva raseljenih osoba i izbjeglica je za "Projekte sanacije šteta od poplava", preraspodjelom s drugih pozicija, Federalna vlada danas izdvojila 6.000.000 KM. Sredstva su namijenjena projektima različitih vidova pomoći za otklanjanje posljedica prirodne nesreće i obnovu nastradalih područja kroz rekonstrukciju i obnovu stambenih objekata, projekata održivosti povratka, humanitarnih i drugih.

Također je u okviru "Transfera pojedincima - podrška povratku izbjeglica i prognanih osoba sa područja Posavine RS" obezbijeđeno 800.000 KM za projekte različitih vidova pomoći za otklanjanje posljedica prirodne nesreće i obnovu područja zahvaćenih prirodnom nesrećom na području Posavine RS kroz rekonstrukciju i obnovu stambenih objekata, projekata održivosti povratka, humanitarnih i drugih sličnih projekata.

Federalno ministarstvo raseljenih osoba i izbjeglica je već ranije interventno djelovalo kroz obezbjeđenje vode, hrane, sredstava za higijenu i dezinfekciju, opreme za urgentnu sanaciju (lopate, kolica, gumene čizme, zaštitne rukavice...), isporuku goriva i slično.

Federalno ministarstvo poljoprivrede, vodoprivrede i šumarstva: Za pomoć 3.225.250 KM

Na prijedlog Federalnog ministarstva poljoprivrede, vodoprivrede i šumarstva, Vlada Federacije BiH je donijela Odluku o izmjenama i dopunama Odluke o usvajanju Programa utroška s kriterijima raspodjele sredstava „Poticaj za poljoprivredu“ utvrđenih Proračunom Federacije BiH za 2014. godinu.

Suština predloženih izmjena i dopuna Programa sastoji se u usaglašavanju teksta Programa novčanih podrški za 2014. godinu sa Zaključkom Predstavničkog doma Parlamenta Federacije BiH od 22. 5. 2014. godine. Ta sredstva su namijenjena za saniranje šteta u poljoprivrednom sektoru koje su nastale usljed elementarnih nepogoda, odnosno poplava i klizišta.

U cilju realizacije izdvojenih sredstava, u Programu novčanih podrški je predviđena nova pozicija koja se odnosi na saniranje šteta u poljoprivredi. Ove izmjene su zahtijevale i izmjenu tabela u Programu novčanih podrški.

Nakon umanjenja, ukupna sredstva u Programu novčanih podrški za 2014. godinu za primarnu poljoprivrednu proizvodnju i ostale podrške iznose 62.574.250 KM, a preostali iznos od 3.225.250 KM se odnosi na sanaciju šteta u poljoprivredi.

Ova izmjena Programa bi trebala doprinijeti da svi klijenti u kantonima koji su pretrpjeli štete u poljoprivrednom sektoru bar donekle budu obeštećeni za štete koje su pretrpjeli na svojim gazdinstvima.

Federalno ministarstvo prostornog uređenja: Za pomoć 1.724.000 KM

Iz Budžeta Federacije Bosne i Hercegovine za 2014. godinu Vlada FBiH odobrila je Federalnom ministarstvu prostornog uređenja izdvajanje 1.324.000 KM potrebnih za hitnu sanaciju klizišta na područjima pogođenim elementarnim nepogodama. Ova sredstva će, u iznosima od po 441.333,33 KM, biti dodijeljena općinama Zenica, Čelić i Vogošća.

Istom ministarstvu je odobreno izdvajanje 400.000 KM namijenjenih projektu utopljanja zgrada radi uštede energije. Sredstva će, u iznosu od po 50.000 KM, biti raspoređena na osam odabranih projekata u općinama Odžak, Orašje, Maglaj, Zavidovići, Kalesija, Srebrenik, Ilidža i Vogošća.

Federalno ministarstvo obrazovanja i nauke: Za pomoć 1.000.000 KM

Vlada FBiH izmijenila je i dopunila Odluku o usvajanju Programa utroška s kriterijima raspodjele sredstava tekućih transfera utvrđenih Budžetom FBiH za 2014. godinu Federalnog ministarstva obrazovanja i nauke. Na ovaj način je obezbijeđen 1.000.000 KM u svrhu saniranja šteta na odgojno-obrazovnim ustanovama nastalim prirodnom nesrećom. Sredstva će biti raspodijeljena na područja Federacije BiH zahvaćena prirodnom nesrećom, odnosno za Zeničko-dobojski, Tuzlanski, Posavski i Unsko-sanski kanton.

Federalno ministarstvo energije, rudarstva i industrije: Za kredite pod povoljnim uslovima 7.600.000 KM

Federalna vlada usvojila je Program utroška dijela budžetskih sredstava utvrđenih za 2014. godinu Federalnom ministarstvu energije, rudarstva i industrije „Izdaci za finansijsku imovinu - Ostala domaća pozajmljivanja“ u iznosu od 7.600.000 KM, a odnosi se na kreditiranje pod povoljnim uslovima privrednih subjekata koji su pretrpjeli štete u poplavljenim područjima. Federalno ministarstvo energije, rudarstva i industrije dostavit će izvještaj o utrošenim sredstvima Federalnom ministarstvu finansija u skladu sa Zakonom o izvršavanju Budžeta FBiH za 2014. godinu.



Kreditni Svjetske banke: Za dva projekta Federaciji BiH 57,7 miliona dolara

Federacija BiH je, današnjim odlukama Federalne vlade, prihvatila zaduženje po dva sporazuma o finansiranju između Bosne i Hercegovine i Svjetske banke - Međunarodne asocijacije za razvoj (IDA).

U prvom slučaju riječ je o kreditu od 47.500.000 dolara, što je 47,5 posto od ukupno odobrenih 100.000.000 dolara za BiH, a namijenjen je finansiranju Projekta hitnog oporavka od poplava u BiH.

Primarni cilj Projekta je nabavka roba hitno potrebnih tokom faze oporavka (logističke i robe za rekonstrukciju, za sektor energetike i električne energije, kao i za oporavak poljoprivrede, pri čemu su kao početni prioriteti određeni gorivo i hrana, te poljoprivredne robe. Sredstva su namijenjena i rehabilitaciji strateške regionalne javne infrastrukture (transportne veze, distributivna i prijenosna infrastruktura, nasipi i druga strateška javna infrastruktura), rehabilitacija lokalne infrastrukture (vodovodi, ceste i mostovi) i kao podrška implementaciji projekta i izgradnju kapaciteta.

Drugi kredit za Federaciju BiH iznosi 10.200.000 dolara, odnosno 42,5 posto ukupno odobrenih 24.000.000 dolara za Bosnu i Hercegovinu.

Sredstva su namijenjena finansiranju Projekta zaštite od poplava Drine. Sveukupni razvojni i opći okolišni cilj Projekta je osigurati veću zaštitu od poplava poljoprivrednih i komercijalnih interesa i zajednica na ovom području, s obzirom na veliku učestalost poplava i njihovih posljedica, zbog čega je ova investicija od prioritarnog značaja.

Oba kredita su odobrena s rokom otplate od 25 godina, uz petogodišnji grace period i godišnju kamatnu stopu od 1,25 posto.

Vlada je dala saglasnost za zaključivanje supsidijarnih sporazuma o zajmu između BiH i FBiH i za njihovo potpisivanje ovlastila federalnog ministra finansija.

VLADA FBiH UTVRDLA PRIJEDLOG ZAKONA O OSNIVANJU FEDERALNOG FONDA ZA POMOĆ NASTRADALIM PODRUČJIMA OD PRIRODNE NESREĆE U FBiH

Vlada Federacije BiH je na 120. sjednici, koja je održana 19. juna/lipnja u Mostaru, ponovo utvrdila i u parlamentarnu proceduru uputila Prijedlog zakona o osnivanju Federalnog fonda za pomoć nastradalim područjima od prirodne nesreće na teritoriji FBiH, nakon što u srijedu (18. juna) Prijedlog ovog zakona nije usvojio Predstavnički dom Parlamenta FBiH.

U utvrđenom Prijedlogu ugrađeni su amandmani izneseni u parlamentarnoj raspravi koja je održana dan ranije, a koje je prihvatila Federalna vlada.



Sa sjednice Vlade FBiH u Mostaru

U VLADI FBiH RAZGOVARANO O MJERAMA NA SANACIJI I OBNOVI PODRUČJA POGOĐENIM PRIRODNOU NESREĆOM



SARAJEVO, 4. juni/lipanj – Na inicijativu federalnog premijera Nermina Nikšića, danas je u sjedištu Vlade FBiH u Sarajevu održan sastanak s premijerima Posavskog, Tuzlanskog, Zeničko-dobojskog, Unsko-sanskog i Sarajevskog kantona, te načelnici općina u kojima je proglašeno stanje prirodne nesreće.

Kako je istaknuto na konferenciji za medije, nakon sastanka, dobra koordinacija između državnog, federalnog, kantonalnog i općinskog nivoa vlasti doprinijela je efikasnijem djelovanju na terenu tako da su umnogome preduprijeđene štete koje su

zbog katastrofalnih poplava mogle biti mnogo veće.

No sada slijedi teži posao - osiguranje finansijskih sredstava kojima će se nezapamćene štete sanirati, očuvati postojeća radna mjesta te izgraditi domovi za stanovništvo koje se vjerovatno neće moći vratiti u kuće ugrožene klizištima.

Nikšić je danas upoznao javnost o konkretnim mjerama koje Vlada Federacije BiH poduzela da bi se osigurala sredstva za sanaciju šteta te donijela odgovarajuća zakonska regulativa koja će omogućiti da se osigurana sredstva što bolje rasporede.

Između ostaloga planirano je osigurati 187 miliona KM od Međunarodnog monetarnog fonda (MMF) kroz proširenje stand-by aranžmana koja će se rasporediti tako da će jedan dio biti osiguran za Brčko Distrikt BiH, a ostalo pola-pola između Vlade Republike Srpske i Vlade Federacije BiH koje će biti utrošene za sanaciju šteta.



Također, u toku su pregovori sa Svjetskom bankom putem koje se planira osigurati 100 miliona dolara za Federaciju BiH, RS i Brčko Distrikt BiH, a Evropska komisija je najavila da će iz IPA fondova izdvojiti 42 miliona eura.

Premijer Nikšić je kazao da bi Vlada FBiH trebala na sutrašnjoj sjednici razmatrati tri važna zakona koji će pomoći da se sredstava što prije rasporede te je dodao da će, ukoliko Vlada FBiH postigne saglasnost o zakonima, biti upućeni u parlamentarnu proceduru po hitnoj proceduri.

Radi se o Zakonu o fondu za pomoć u obnovi područja zahvaćenih prirodnom nesrećom, Zakonu o finansiranju pomoći stradalim u prirodnoj nesreći te Zakonu o prijenosu vlasništva nad nekretninama u vlasništvu Federacije BiH, kantona, gradova i općina.

U ovaj fond trebali bi biti uključeni predstavnici Vlade FBiH, kantona, donatora, predstavnici poslodavaca, parlamentarca i nevladinog sektora, ali i svi oni koji bi dali doprinos u kontroli i praćenju utroška sredstava fonda da bi se sredstva trošila na transparentan način.

- Od Agencije za bankarstvo i Centralne banke zatražili smo da, u saradnji s bankarskim sektorom, nađu mogućnost za stavljanje moratorija, produženja grejs perioda ili iznalaženja drugačijih mogućnosti da bi se za fizičke i pravne subjekte prolongirala otplata kredita. Ista aktivnost je pokrenuta i prema Razvojnoj banci FBiH - kazao je premijer Nikšić.

Podsjetio je da Svjetska banka, Ujedinjene nacije i Evropska komisija, uz predstavnike državnih i entitetskih institucija te Brčko Distrikta BiH, rade procjenu šteta u sektorima energija, transport, agrikultura, stanovanje, infrastruktura, voda i sanitarije te šteta u ekonomiji i gubitku radnih mjesta. Prvi preliminarni rezultati trebali bi biti poznati do 18. juna.

Iako se ova procjena čeka, Nikšić je rekao da je prema preliminarnim podacima Zavoda za zapošljavanje Federacije BiH, nakon poplava i klizišta ugroženo oko 15.000 radnih mjesta i to 5.000 u poljoprivredi i 10.000 u privredi.

- Predviđa se da će štete u Federaciji BiH biti mnogo veće u područjima pogođenim klizištima, nego u područjima pogođenim poplavama što će uzrokovati da se veliki broj stanovništva neće moći vratiti u svoje domove - dodao je Nikšić.

Najavio je da će se učiniti sve da svi oni koji su ostali bez krova nad glavom do zime riješe svoje stambeno pitanje. Za one za koje se to ne riješi nastojat će se osigurati mjesto boravka koje neće biti kolektivni centar.

Premijer Tuzlanskog kantona Bahrija Umihanić istakao je danas dobru saradnju s Vladom FBiH i pozdravio njene mjere na obnovi.

Umihanić je kazao da u sanaciji šteta treba osigurati da to rade domaće firme kako bi postojeći privredni subjekti ojačali i da bi novi poslovni subjekti pronašli svoju šansu.

Informacije koje su se u javnosti pojavile da u Maglaju nedostaje hrane i drugih potrepština demantirali su danas premijer Zeničko-dobojskog kantona Munib Husejnagić i direktor Federalne uprave civilne zaštite Fahrudin Solak uz konstataciju da su to informacije Crvenog križa. Ustvrdili su da u ovom gradu ima dovoljno hrane i higijenskih potrepština.

Zeničko-dobojski, Posavski i Tuzlanski kanton, proglasili su stanje prirodne nesreće, a Sarajevski i Srednjobosanski imaju štete, dok je 31 općina u Federaciji BiH proglasila stanje prirodne nesreće. (<http://www.fbihvlada.gov.ba>)

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

APEL ZA POMOĆ UGROŽENOM STANOVNIŠTVU OPĆINE SAPNA

Zbog stanja prirodne nepogode koja je zahvatila područje općine Sapna, a prvenstveno zbog pojave velikog broja klizišta koja su u potpunosti uništila nekoliko stambenih objekata a veliki broj istih ugrozilo, 28 stanovnika sa područja ove općine je iseljeno i smješteno u kolektivni smještaj (Osnovna škola „Sapna“).

Općina Sapna upućuje apel i moli sve koji su u mogućnosti, za gore pomenuto stanovništvo da doniraju odgovarajuće krevete, jorgane, posteljine, jastuke i dušeke.

Napominjemo da se među 28 stanovnika smještenih u pomenuti kolektivni smještaj nalazi i jedna beba te Vas molimo da za istu donirate i odgovarajući krevetić.

Sve dodatne informacije možete dobiti na broj telefona 061/506-974 i 035/599-548, kontakt osoba Hanifa Selamović, dipl.pravnik.



Grb Općine Sapna





OPĆINA CENTAR SARAJEVO NOVČANO POMAŽE POPLAVLJENE OPĆINE



Delegacija Općine Centar Sarajevo u posjet Općini Doboju Jug

Sarajevska općina Centar prihvaćajući društvenu odgovornost i solidarnost prema nerazvijenim sredinama, u posljednja tri mandata, u tu svrhu, izdvojila je 10,8 miliona maraka. Za 22 poplavljenе općine vijeće odobrilo grant od pola miliona maraka.

Višečlana delegacija Općine Centar Sarajevo na čelu sa predsjedavajućim OV Nedžadom Ajnadžićem boravila je u Općinama Doboju Istok, Doboju, Doboju Jug, Maglaj i Žepče kojom prilikom je potpisala protokole o realizaciji granta pod nazivom „Pomoć drugim općinama za sanaciju posljedica poplava i klizišta“ za koje namjene je Općina Centar izdvojila pola miliona maraka za dvadesetdvije općine.

Općini Doboju Jug je ovim povodom namjenski uručena pomoć u iznosu od dvadeset hiljada maraka.

Nedžad Ajnadžić je kazao da Općina Centar ima društvenu odgovornost pomažući male i nerazvijenije lokalne zajednice. U ove namjene u posljednja tri mandata Općina Centar je izdvojila više od deset miliona maraka.

„Posljednje poplave i klizišta su napravile razorne štete u više sredina naše zemlje. Na prijedlog načelnika Dževada Bećirevića, Općinsko vijeće se nije dvoumilo da odvoji sredstva i pruži znatnu materijalnu i novčanu pomoć nastradalim područjima“, kazao je Nedžad Ajnadžić.

Zahvaljujući se na podršci i razumijevanju, općinska načelnica Jasminka Begić nije krila zadovoljstvo što je i Općina Centar prepoznala potrebe poplavljenih građana Doboju Juga.

„Svaki vid pomoći nama je dobro došao. Trebaće nam puno vremena da se nakon poplave oporavimo. Samo u oblasti privrede na području općine šteta (direktna i indirektna) je 11 miliona maraka, na stambenom fondu oko tri miliona“, kazala je načelnica Begić istakavši da je pomoć od Općine Centar treća pomoć koju ova općina pruža Doboju Jugu, što je za svaku pohvalu.

Pomoć ovoj poplavljenoj općini dolazi, ali na šačicu. U subotu se očekuje dolazak višečlane delegacije iz bratimljene Općine Sindžan (Ankara) koja je najavila konkretnu pomoć. Za početak donirali su sredstva za stotinu iftara dnevno za postače iz Doboju Juga, a poplavljenim građanima obećali i novčanu pomoć.



Grb Općine Doboju Jug



Grb Općine Centar Sarajevo

U BIH STIGLO 25 KAMIONA NAMJEŠTAJA IZ TURSKE, OČEKUJE SE JOŠ 75




Od stotinu kamiona namještaja koliko su privrednici Turske najavili da će poslati za poplavljenу područja Bosne i Hercegovine, već je stiglo 25 kamiona, a namještaj je podijeljen u najugroženije dijelove Maglaja, Olova, Bosanskog Šamca, Modriče i nekoliko drugih gradova koji

su 15. maja/svibnja ove godine pogođeni razornim poplavama.

Tokom katastrofalnih poplave u BiH, Turska je poslala značajnu pomoć u hrani i drugim potrepštinama za našu zemlju. No, Udruženje turskih proizvođača namještaja i industrijalaca istovremeno je pokrenulo kampanju pod nazivom "Sto šlepera namještaja", koje planiraju podijeliti poplavama najugroženijem stanovništvu u BiH.

Adis Alagić iz Fondacije BIGMEV (Centar za razvoj odnosa sa BiH), koja koordinira akcijom dopremanja namještaja iz Turske u BiH kazao je za agenciju Patria kako je u BiH već došlo 13 kamiona namještaja koje je za BiH donirala kompanija Cilek, te još 12 kamiona koje su donirale druge firme i organizacije.

„Tražili smo da nam više ne šalju hranu, jer toga imamo dovoljno. Potrebna nam je pomoć u namještaju, ali i u građevinskom materijalu. Prema posljednjim informacijama koje imam, jedna tura kamiona sa građevinskim materijalom iz Turske već je krenula prema BiH, dok se drugi kamioni pripremaju za polazak prema našoj zemlji“, rekao je Alagić.





USAID I AMBASADA SAD-A OBEZBJEDILE 10 MIL. USD ZA SANACIJU VRTIĆA, ŠKOLA I PODRŠKU ZAPOSLENIM

11. juni/lipanj – Američka agencija za međunarodni razvoj (USAID) i Ambasada SAD u BiH saopštile su juče da su obezbijedile deset miliona dolara za drugu fazu saniranja posljedica poplava u BiH, prenosi portal eKapija.

Ta sredstva, koja su stajala u Centralnoj banci BiH, biće iskorišćena za saniranje škola, vrtića i očuvanje radnih mjesta.

Otpisnik poslova u Ambasadi SAD u BiH Nikolas Hil rekao je da, nakon prve hitne faze, nastupa faza oporavka i da je pomenuti iznos namijenjen za te svrhe.

„Program će napraviti USAID u saradnji sa lokalnim zajednicama. Od izuzetno velike važnosti je kako će novac biti trošen i da se on troši na transparentan način i u saradnji sa općinama“, istakao je Hil.

Dodao je da će u narednim sedmicama i mjesecima pomoć biti značajna, ali da neće biti dovoljna da bi se zadovoljile potrebe onih koji su pogođeni katastrofom.

„Da bi BiH prevazišla posljedice, treba da radi na poboljšanju klime za strane investitore. Vlada SAD će raditi sa vama i sagledavati potrebe da vidimo kako možemo pomoći“, poručio je on.

Dejvid Bard iz USAID-a je kazao da stanovništvo poplavljenih područja još trpi posljedice i da BiH treba pomoć. Ministar finansija Nikola Špirić rekao je da su USAID i Ambasada SAD bili prvi koji su pritekli u pomoć i da su gosti tokom jučerašnjeg sastanka posjetili Operativno-komunikacijski centar BiH da bi se uvjerali u razmjere štete koju su načinile poplave.

Gouverner Centralne banke Kemal Kozarić kazao je da će sredstva biti trošena na transparentan način.

„Biće iskorišćena za čuvanje radnih mjesta jer u BiH ima 27,5% nezaposlenih. Sa nesrećom koja ju je zadesila, BiH ima još težu situaciju da sačuva svako radno mjesto“, rekao je Kozarić.

KLIZIŠTA U DOBOJ JUGU OBIŠAO GEOLOG

„Odazvao sam se na poziv Civilne zaštite da ispred Federalnog geološkog zavoda vidim o čemu se radi“, kazao je dr. geologije Ferid Skopljak koji je sa predstavnicima Općine Doboj Jug obišao aktivirana klizišta u Mravićima. Njegovo interesovanje su bile lokacije klizišta koje direktno ugrožavaju stambene objekte, dok na druge destinacije na ovom području gdje su se također pojavila klizišta nije stigao uraditi svoj nalaz. Kako je u posljednjih sedam dana obišao osam općina i izvršio uvid, sačinio zapisnik sa prijedlozima mjera za petstotina klizišta, dr. Skopljak je to učinio i za klizišta u Mravićima, te svoje zapisnike uručio nadležnoj općinskoj službi kako bi općina mogla blagovremeno poduzeti preventivne mjere. Opšta konstatacija na svih pet posjećenih klizišta je da je u pitanju nemar i loš odnos prema odvodnji oborinskih i površinskih voda, te voda iz septičkih jama koje su neuslovne, vode iz oluka sa kuća itd. (<http://www.dobojjug.ba>)



UNDP URUČIO DVIJE PUMPE ZA ISPUMPAVANJE MULJA OPĆINI DOBOJ JUG



Kako UNDP koordinira fond nekoliko međunarodnih organizacija za pomoć u sanaciji od poplava, ovih dana se na poplavljenim područjima od strane UNDP-a distribuira određena vrsta pomoći. Tako je Općinu Doboj Jug posjetila predstavnica UNDP-a, inače regionalna savjetnica za lokalnu upravu u Projektu integrisanog lokalnog razvoja (ILDP) Tanja Mihajlović i općinskoj načelnici Jasminki Begić uručila dvije pumpe za ispušćivanje mulja. Pumpe su kupljene iz sredstava fonda UNDP-a, SAD i Kraljevine Norveške. Članica ovog fonda je i Švicarska organizacija za razvoj SDC, kazala je Mihajlovićeva.





PREKO 200 KLIZIŠTA NA PODRUČJU OPĆINE ŽEPČE



Žepče - Papratnica, posljedice klizišta

Na teritoriju Općine Žepče zabilježen je znatan broj većih i manjih klizišta koja su ugrozila stambene objekte i infrastrukturu (putevi, vodovodi i sl.).

Predsjednici mjesnih zajednica i povjerenici civilne zaštite dostavili su podatke o klizištima na njihovom teritoriju, kao i sami građani. Na osnovu ovih podataka i obilaska terena napravljena je baza podataka u kojoj trenutno imamo oko 30 većih klizišta i 170 manjih klizišta. Velika klizišta zahtijevaju monitoring i izradu projektne dokumentacije za saniranje klizišta. Sva klizišta nisu još snimljena i nastavak obilaska geologa je od ponedjeljka.

Općina Žepče uspostavila je suradnju s

Federalnim zavodom za geologiju i njihovi stručni timovi su već dva puta bili u Željeznom Polju i dostavili informaciju o klizištima u ovoj Mjesnoj zajednici s prijedlogom mjera.

Geološkim pregledom utvrđen je značajan broj klizišta koja su zahvatili relativno veliku površinu, što je uzrokovalo rušenje i oštećenje određenog broja stambenih objekata, prekidanje ili oštećenje puteva, uništenje poljoprivrednog zemljišta i oštećenje lokalnih vodovoda.

Prema prvim nalazima, zemljište na klizištima gdje su porušeni i teško oštećeni objekti u budućnosti se može koristiti samo kao poljoprivredno zemljište. Prema nalazu stručnjaka potrebno je hitno spriječiti dalju infiltraciju oborinskih voda i voda iz izvora i objekata za vodosnabdjevanje u pukotine na padinama iznad klizišta. Sve pukotine potrebno je zapuniti glinovitim materijalom, zapuštene propuste pročistiti, osobito one kojima je voda skrenuta u klizište. Također, vodu iz čeonih zona velikih klizišta (iznad objekata) potrebno je privremeno odvesti PVC cijevima površinom terena.

Potrebno je uspostaviti geodetski monitoring svih velikih klizišta s prioritetom gdje se nalaze stambeni objekti i objekti infrastrukture.

Osim ovih klizišta u Željeznom Polju dogovoren je obilazak i velikih klizišta na ostalom području općine, kao što su Papratnica, Bljuva, Gornji Vitlaci, Globalica, Komšići i dr.

Osim angažmana Federalnog zavoda za geologiju, Općina Žepče također je angažirala jednog geologa za obilazak svih klizišta na njenom teritoriju.

Cilj je napraviti kartu svih klizišta i građanima koji su direktno ugroženi klizištima konkretnim savjetima pomoći u preventivnim mjerama.



Grb Općine Žepče

TURSKA OPĆINA KARAMURSEL SE UKLJUČILA U PRUŽANJE POMOĆI POPLAVLJENIM PODRUČJIMA U BIH

STARI GRAD SARAJEVO, 04. juni/lipanj – Građani općine Karamursel iz Republike Turske koju sa Općinom Stari Grad od 2006. godine veže Sporazum o bratimljenju, prikupili su finansijsku pomoć za stanovnike Bosne i Hercegovine koji su stradali u poplavama i klizištima.

Predstavnici građana Karamursela: Abdullah Alpsan, Odasi Yenetim i Engin Sagkol, upoznali su danas načelnika Ibrahima Hadžibajrića sa načinom na koji su do sada pomogli ugroženom stanovništvu. Djeci bez roditelja koja žive u poplavljenim područjima, ili su ugroženi klizištima, prijatelji iz Karamursela su donirali 4.000 eura. Putem Općine Stari Grad, donirali su još 1.000 eura za grad Maglaj. Kako je Općina Stari Grad, putem Saveza gradova i općina FBiH, upoznata sa teškom situacijom u ovom gradu, te nestašicom goriva za vozila i mašine koje čiste grad, odlučeno je da taj novac bude iskorišten upravo za te svrhe.

Karamursel se nalazi na sjeverozapadu Turske i broji oko 54.000 stanovnika. Karakterističan je po tome što ga naseljava veliki broj iseljenika iz Bosne i Hercegovine i zemalja regiona.



Predstavnici grada Karamursel sa načelnikom
Općine Stari Grad



POMOĆ IZ UAE ZA POPLAVLJENA PODRUČJA



Predstavnici Fondacije Khalifa Bin Zayed iz UAE u obilasku klizišta

Posredstvom Ministarstva vanjskih poslova BiH danas su Maglaj, Žepče i Zenicu posjetili Mohammed Tassim i Amer Houssain predstavnici Fondacije Khalifa Bin Zayed iz Ujedinjenih Arapskih Emirata. U neposrednom kontaktu, najprije sa načelnicima općina, a potom i građanima koji rade na terenu koji rade na uklanjanju posljedica poplave ovi humanitarci su se interesovali za prioritete potrebe stanovnika nakon katastrofe.

Osnovni cilj i namjera Fondacije Khalif Bin Zayed je da se neposredno pomogne Bosni i Hercegovini kroz pružanje materijalne i tehničke logistike na terenu, u lokalnim zajednicama.

Fondacija je, to je posebno istaknuto već ugovorila isporuku specijalne mehanizacije neophodne za uklanjanje klizišta i riječnih nanosa. Obezbijeđen je i kontingent opreme, sredstava i hrane koji su potrebni radnicima i stanovnicima na područjima pogođenim poplavom. Predstavnici Fondacije iz UAE su već potpisali ugovore sa izvođačima preko kojih će nabaviti sredstva. „Nije slučajno da su ugovori o nabavi potpisani sa firmama iz Bosne i Hercegovine. Naime, i na takav način želi se pomoći ekonomiji zemlje“, kazali su Tassim i Hussain.

Domaćini, načelnici Maglaja Mehmed Mustabašić, Žepča Mato Zovko, Zenice Husejin Smajlović sa premijerom ZDK Munibom Husejnagićem su obišli teren i upoznali donatore sa prioritarnim potrebama. O finansijskoj vrijednosti sredstava i opreme predstavnici Fondacije Khalif Bin Zayed nisu govorili, ali su naglasili da će biti operativna za 10 dana.

Zanimljivo je da se prvi put desilo kako tvrde gosti da je predsjednik Fonadacije odmah po saznanju o poplavama u Bosni i Hercegovini uputio ovu ekipu direktno na teren sa konkretnom zadaćom da sagledaju potrebe u prvoj fazi koja je urgentna i da o tome izvjestje centralu. Navodno je ovo jedinstven slučaj otkako postoji Fondacija.

KORISNI LINKOVI ZA PREDPRISTUPNE FONDVE EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

U ZE-DO KANTONU EVAKUISANO 7.877 OSOBA SA ŠTETOM OD 500 MILIONA KM

Općinski štabovi civilne zaštite dostavili su Kantonalnom štabu civilne zaštite Zeničko-dobojskog kantona prve preliminarne procjene šteta u svih 12 općina Kantona. Prema njihovim procjenama koje je Štab razmatrao na sjednici od 4. juna/lipnja, ukupna šteta na području Kantona, bez podataka o štetama na privrednim objektima iznosi 253.763.000 KM, a kada se ovoj cifri pribroje štete u privredi, predviđa se da će suma preći 500 miliona KM. Najviše porušenih stambenih objekata od ukupno 245 je na teritoriji Općine Zenica – 97, zatim Žepča – 80, Maglaja – 29, Olova – 16, Kaknja – 10, Zavidovića – 8, Visokog – 3, Vareša – 2 dok u općinama Tešanj, Usora, Breza i Doboj-Jug nema prijavljenih porušenih kuća. Prijavljeno je i 4.165 oštećenih stambenih objekata od čega najviše na teritoriji Općine Maglaj – 1551, Zenica – 610, Kakanj – 500, Zavidovići – 388, Doboj-Jug – 319, Žepče – 300, Olovo – 200, Tešanj – 130, Breza – 70, Usora – 50, te Vareš – 24 i Visoko – 23.

Procjenjuje se da štete na zemljištima, oranicama i zasadima trenutno iznose 8.134.000 KM. Štete na stočnom fondu su 668.000 KM pod čim se podrazumijeva kako uginula tako i oboljela stoka. U ovom trenutku teško je procijeniti sve štete na infrastrukturi, ali preliminarne pokazatelji govore da ona iznosi oko 77.505.000 KM, dok su štete od klizišta procijenjene na 37.419.000 KM. Oštećenja na vodovodima na području Kantona trenutno iznose 2.095.000 KM, a na ostalim infrastrukturnim objektima 20.221.000 KM. Time ukupne štete na području Općine Zenica iznose – 85,3 miliona KM, Maglaja – 67,7 miliona KM, Žepča – 23,7 miliona KM, Kaknja – 20 miliona KM, Olova – 18 miliona KM, Doboj-Juga – 14 miliona KM, Zavidovića – 12,7 miliona KM, Breza – 4,5 miliona KM, Tešnja – 2,8 miliona KM, Vareša – 2,22 miliona KM, Visokog – 1,4 miliona KM i Usore – 1,2 miliona KM.

Zbog posljedica poplava i klizišta, na području Kantona evakuirano je ukupno 7.877 lica, od čega sa teritorije Općine Zenica – 2.500, Žepča – 2.162, Zavidovića – 1.477, Maglaja – 1.151, Tešnja – 288, Kaknja – 112, Visokog – 80, Olova – 40, Usore – 25, Doboj-Juga – 23, Vareša – 11 i Breze – osam osoba. Svi evakuirani smješteni su ili kod rodbine ili u kolektivnim centrima.

Nakon prvih procjena, Kantonalna komisija za procjenu šteta izvršit će kontrolu dostavljenih podataka, a da bi se utvrdili konačni rezultati stvarnih šteta bit će potrebno više mjeseci.

Kantonalni štab civilne zaštite informisan je da je jučer pušten u rad privremeni most u mjestu Podkamensko na putnoj dionici Zavidovići-Olovo čime je omogućena putna komunikacija koja će biti u upotrebi. Na ovom mjestu je prije poplava počela izgradnja mosta.

U informaciji o snabdijevanju pitkom vodom je saopšteno da na terenu, osim švedskog rade i po jedan njemački i mađarski tim, a iz kantonalne Direkcije za robne rezerve danas će u ugrožena područja ponovno biti upućene veće količine flaširane vode za piće. Pored toga, danas će se isporučiti 20 tona stočnog brašna i 20 tona kukuruzne prekrupice na teritorije općina Zenica, Žepče, Maglaj, Zavidovići i Olovo. Pravo na ovu pomoć imaju vlasnici stoke do kojih se ne može doći dramskim putem, zatim vlasnici koji su zajedno sa grlima evakuisani iz svojih domaćinstava i vlasnici preko pet grla goveda koji su pretrpili štetu na usjevima ili objektima.



Topčić polje



VLADA ZDK POMAŽE OPĆINE SA 410.000 KM

Vlada Zeničko-dobojskog kantona je na vanrednoj sjednici donijela odluku o dodjeli jednokratne pomoći za hitne intervencije općinama koje su zabilježile štete tokom prirodne nesreće.

Za saniranje šteta od poplava odobrena je suma od 410.000 KM, a namjenski će se općinama Zenica i Maglaj uputiti po 80.000 KM, za Žepče 60.000 KM, Zavidoviće 50.000 KM, Olovo 35.000 KM, Kakanj 25.000 KM, Vareš 20.000 KM, Tešanj i Doboju-Jug po 15.000 KM, te općine Breza, Visoko i Usora po 10.000 KM.

Novac je namijenjen finansiranju radova na osposobljavanju putnih infrastrukturnih objekata u područjima ugroženim poplavama i biće uplaćen na poseban račun općina namijenjen posebnim naknadama za zaštitu i spašavanje.

DJELATNICI VATROGASNE POSTROJBE KISELJAK I KREŠEVO BORAVILI U ODŽAKU

Djelatnici vatrogasne postrojbe Općine Kiseljak, zajedno s vatrogascima Općine Kreševo boravili su dva dana u Odžaku, kako bi pomogli u čišćenju i saniranju šteta nastalih poplavom na području Odžaka.

Pored vatrogasnog vozila Općine Kiseljak, u pomoć je priteklo i vozilo Ceste Company, kapaciteta osam tona.

Kako doznajemo od vatrogasaca u Odžaku su sapirali ulice, čistili objekte, gradske trgove, vjerske i privatne objekte.

"Svom snagom smo čistili i pomogli, jer uistinu trebamo pomagati jedni drugima, prizor koji se tamo može vidjeti nikoga ne može ostaviti ravnodušnim" kazali su djelatnici vatrogasne postrojbe Kiseljak.



PROJEKT FONDA OTVORENOG DRUŠTVA I OPĆINE ZENICA U SANIRANJU ŠTETA OD POPLAVA I KLIZIŠTA

Open
Society Fund
Bosnia & Herzegovina



Fond
otvoreno društvo
Bosna i Hercegovina

ZENICA, 20. juni/lipanj – Fond otvoreno društvo Bosne i Hercegovine (FOD BH) je odlučio da realizuje projekat „Pomoć u saniranju šteta izazvanih nastupanjem stanja prirodne nesreće u općini Zenica – OSF FRP“ s

ciljem da, u relativno kratkom vremenu, u partnerstvu sa Općinom Zenica obezbijedi hitnu podršku naporima u saniranju nastalih šteta, kako bi se poboljšali uslovi života za ugroženo stanovništvo.

Projekat je dizajniran tako da u relativno kratkom periodu omogući rekonstrukciju određene oštećene ili uništene javne infrastrukture/objekta, kao i privremeno zapošljavanje i stvaranje dohotka za jedan dio najugroženijeg stanovništva. Ovo se namjerava postići iniciranjem i realizacijom projekta rekonstrukcije sa relativno značajnim učešćem radne snage, koji će se identifikovati, finansirati i implementirati u saradnji sa općinom Zenica.

FOD BH je za realizaciju ovog projekta u općini Zenica obezbijedio 175.000 USD vlastitih sredstava, a od lokalne zajednice se očekuje da obezbijedi 30% vlastitog učešća. Slični projekti će se realizovati i u Tuzli i Bijeljini.

Fondacija je Općinu Zenica prepoznala kao potencijalnog korisnika i partnera u realizaciji ovog projekta, prvenstveno zbog ogromnih šteta koje je pretrpila u nedavnim nepogodama. FOD BH početkom 2014. godine je u Zenici uspješno otpočeo projekat „Budžet za građane“. Izuzetno cijeneći dosadašnju uspješnu saradnju sa općinom Zenica, kao i uviđajući potencijalni sinergijski efekat u realizaciji ova dva projekta FOD BiH je donio odluku o pomoći općini Zenica, ističe se u saopćenju Fonda.

Projekat „Pomoć u saniranju šteta izazvanih elementarnim nepogodama u općini Zenica – OSF FRP“ se finansira iz sredstava „Rezervnog fonda“, koji je mreža Fondacija otvoreno društvo uspostavila s ciljem brze reakcije na nepredviđene događaje i krize. Iz ovog Fonda je obezbijedeno dodatnih 100.000 USD za podjelu humanitarnih paketa pomoći stanovništvu na poplavljenim i klizištima ugroženim područjima u BiH.

Danas je načelnik Općine Zenica Husejin Smajlović potpisao Memorandum o razumijevanju s Fondom otvorenog društva Bosne i Hercegovine, sa sjedištem u Banjaluci koga predstavlja Bogdan Popović koordinator programa.

FOD BH je za realizaciju ovog projekta u općini Zenica obezbijedio 175.000 USD vlastitih sredstava, a od lokalne zajednice se očekuje da obezbijedi 30% vlastitog učešća. Slični projekti će se realizovati i u Tuzli i Bijeljini.



Grb Općine Zenica



DEVET OPĆINA BIH DOBIJA 1,3 MIL. EUR IZ IPA FONDOVA ZA JAČANJE KONKURENTNOSTI MALIH I SREDNJIH PREDUZEĆA

SARAJEVO, 2. juni/lipanj – Šef Delegacije EU u BiH i specijalni predstavnik EU Peter Sorensen danas je u Sarajevu sa načelnicima devet općina iz BiH potpisao memorandum o saradnji u okviru projekta "Podrška EU uspostavljanju i jačanju poslovne infrastrukture za unapređenje konkurentnosti malih i srednjih preduzeća".

Projekat je vrijedan 1,3 mil EUR, a novac iz IPA fondova biće dodijeljena Bihaću, Mostaru, Novom Travniku, Orašju, Ljubuškom, Laktašima, Tesliću, Istočnom Novom Sarajevu i Brčko Distriktu.

Ove općine imaju namjeru da na svojoj teritoriji izgrade poslovne zone, a studija



izvodljivosti samo je prvi korak. Vođa tima EUSESBI projekta William P. Lewis kazao je da se ovim putem uspostavlja formalni mehanizam saradnje sa EUSESBI projektom u izradi studije izvodljivosti za projekte poslovne infrastrukture.

"Ovi projekti imaju zajednički kombinovani potencijal da zajedno stvorimo približno 11.000 novih radnih mjesta širom BiH i doprinesemo revitalizaciji odnosno obnovi ekonomije. Ovo partnerstvo predstavlja opredijeljenost i predanost EU da nastavi pružati podršku BiH u svrhu jačanja njene ekonomije i poboljšanja životnog standarda svih njenih građana", pojasnio je Lewis.

Precizirao je da će projekat EUSESBI omogućiti razvoj poslovnih lokacija širom BiH, spremnih za biznis i ponuđenih po konkurentnim cijenama.

"Projekat će doprinijeti privlačenju stranih investicija, povećati konkurentnost malih i srednjih preduzeća, uključujući i one u ruralnim područjima kao i područjima pogođenim poplavama i stvoriti nove prilike za zapošljavanje", rekao je Lewis.

Načelnik Općine Novi Travnik Refik Lendo podcrtao je da građani Novog Travnika, ali i cijele BiH žele NATO i EU.

"Želimo nova znanja, nove standarde. Lokalne zajednice danas se najviše pripremaju na polju investiranja, zapošljavanja, otvaranja novih radnih mjesta. Želimo poslati poruku ohrabrenja domaćim i stranim investitorima da se u BiH isplati ulagati, posebno kada su u pitanju industrijske zone", rekao je Lendo.

Istakao je prednosti koje nudi Općina Novi Travnik.

"Nudimo najjeftinije zemljište, kada je u pitanju industrijska zona. Ona je cijenjena 3,5 KM uz rentu od 12 KM, to iznosi ukupno 15,5 KM po kvadratu. Nudmo zemljište gdje su svi imovinsko-pravni problemi riješeni, tako da investitori mogu u vrlo kratkom vremenu kupiti zemljišne dozvole i krenuti u investiciju. Naša je procjena da će u narednom periodu od četiri, pet godina u toj zoni otvoriti se oko 2.000 novih radnih mjesta", poručio je Lendo.

Načelnik Općine Bihać Emdžad Galijašević zahvalio se EU što je prepoznala Bihać kao grad kome treba pomoći u pravljenu boljeg poslovnog ambijenta.

"Projekat EUSESBI u mnogome je značajan za BiH, zemlju u kojoj ne radi 45 posto stanovnika, a isto takvo stanje je i u Bihaću. Bihać je univerzitetski grad, gdje studira 6.000 osoba. Mladi ljudi odlaze iz Bihaća i ove zemlje. Strateško ili prioritarno pitanje svij u nas treba biti privreda i ulaganje u bolji poslovni ambijent. Mi kao općina radimo u granicama svojih mogućnosti. Definitivno sami ne možemo. Ovo je više nego velika pomoć", kazao je Galijašević.

Galijašević smatra da bi se u Bihaću moglo zaposliti od 1.000 do 2.000 ljudi.

"Poručujemo investitorima da imamo dobre poslovne zone i da dajemo olakšice. Bihać je grad koji graniči sa EU. Imamo evropsko tržište na dlanu", dodao je bihaćki načelnik.

Lokacija buduće industrijske zone u Laktašima nalazi se neposredno pored aerodroma, istakao je načelnik općine Laktaši Milovan Topolović. On smatra da će izgradnja mosta na Savi doprinijeti da industrijska zona bude još atraktivnija.

U općini Istočno Novo Sarajevo već rade na prilaznim putevima, kaže načelnik Ljubiša Ćosić. Svrha memoranduma je uspostavljanje zvaničnog partnerstva, mehanizma saradnje između ovog projekta i općina u BiH koje su odabrane u okviru sveobuhvatnog, fer i transparentnog procesa za izradu studija izvodljivosti i idejnih rješenja za projekte za razvoj poslovne infrastrukture, sa zajedničkim potencijalom da kreiraju više od 10.000 novih radnih mjesta u BiH.

KORISNI LINKOVI ZA PREDPRISTUPNE FONDOVE EU:

www.southeast-europe.net

www.adriaticipacbc.org

www.interregadriatico.it

www.europa.ba

www.cbib-eu.org

www.cbc.bih-mne.org

www.srb-bih.org

www.cbc-cro-bih.net

www.programmmed.eu

www.tacso.org

www.euroinfocentar.ba

www.balkanfund.org

www.eurelmed.com

www.eacea.ec.europa.eu

Projekat je vrijedan 1,3 mil EUR, a novac iz IPA fondova biće dodijeljena Bihaću, Mostaru, Novom Travniku, Orašju, Ljubuškom, Laktašima, Tesliću, Istočnom Novom Sarajevu i Brčko Distriktu.



ŠVEDSKA ŠALJE POMOĆ NA BALKAN OD 400 MIL. EURA

Švedska će za četiri balkanske zemlje izdvojiti 400 mil. eura za pomoć u sprovođenju reformi neophodnih za ulazak u EU, izjavio je u ponedjeljak (2. juni) švedski ambasador u Bosni i Hercegovini Stefan Fredrik Schiller.

Ambasador Schiller je rekao da će ta sredstva pomoći Albaniji, Bosni i Hercegovini, Srbiji i Kosovu da reformišu administraciju i pravosuđe i osiguraju zaštitu ljudskih prava.

"Razorne poplave su promijenile realnost na terenu", rekao je švedski ambasador u Sarajevu prilikom predstavljanja novog švedskog programa pomoći zapadnom Balkanu.

Švedska namjerava da pomogne Srbiji i Bosni i Hercegovini kratkoročno i dugoročno, istako je, dodajući da će samo Bosna i Hercegovina dobiti oko 100 mil. eura.

Schiller je kazao da će prilikom izručivanja tih sredstava, u periodu od 2014. do 2020. godine, biti uzeta u obzir šteta koju su u Srbiji i Bosni i Hercegovini prošlog mjeseca pričinile poplave, najgore u tom regionu od kada se pamti, navodi "Rojters".

"Rojters" podsjeća da je Evropska banka za obnovu i razvoj procijenila da šteta od poplava u Srbiji iznosi do 2 mlrd EUR, odnosno 7% BDP, a u Bosni 1,3 mlrd EUR, odnosno 10% BDP.



USTAVNI SUD FBIH PRESUDIO U KORIST OPĆINA VAREŠ I OLOVO

Ustavni sud Federacije Bosne i Hercegovine odlučujući o zahtjevu načelnika Općine Vareš i Općine Olovo za zaštitu prava na lokalnu samoupravu u vezi sa Zakonom o šumama, koji je donijela Skupština Zeničko-dobojskog kantona, na osnovu člana IV.C.10.(3) Ustava Federacije Bosne i Hercegovine, a u vezi sa Amandmanom XCVI na Ustav Federacije Bosne i Hercegovine, na sjednici bez javne rasprave održanoj dana 13.05.2014. godine donio je presudu kojim se utvrđuje se da je Zakonom o šumama („Službene novine Zeničko-dobojskog kantona”, broj: 8/13) povrijeđeno pravo Općine Vareš i Općine Olovo na lokalnu samoupravu.

Presudom se daje mogućnost Skupštini Zeničko-dobojskog kantona da u roku od šest mjeseci od dana objavljivanja ove presude u „Službenim novinama Federacije BiH”, i „Službenim novinama Zeničko-dobojskog kantona” izvrši usaglašavanje zakona iz tačke 1. ove presude sa Zakonom o principima lokalne samouprave u Federaciji Bosne i Hercegovine („Službene novine Federacije BiH”, broj: 49/06) do kada se ovaj zakon može primjenjivati.



OPĆINA GORAŽDE OPRAVDALA CERTIFIKAT ISO 9001- 2008



GORAŽDE, 24. juni/lipanj – U Općini Goražde u protekla dva dana proveden je drugi recertifikacijski kontrolni eksterni nadzorni audit, koji je imao za cilj da utvrdi stanje sistema kvaliteta u službama za upravu Općine Goražde. S tim ciljem, juče i danas u Općini Goražde boravio je prof.dr. Halil Gutošić, eksterni auditor koji dolazi iz certifikacijske kuće Bureau Veritas iz Rijeke. On je ovom prilikom, uz asistenciju Q menadžera Sanida Ziraka kao certificiranog internog auditora, vršio kontrolu sistema kvaliteta i usklađenost procedura u skladu sa postojećim

certifikatom ISO 9001-2008. Ovom eksternom auditu prethodio je interni audit koji je proveden po službama, a koji je za cilj imao utvrđivanje neusklađenosti procedura te usklađivanje istih.

Nakon provjere i izvršenog eksternog audita po službama gosp. Gutošić je konstatovao da je jako zadovoljan postojećim stanjem, te da je došlo do poboljšanja sistema, kao i da su uvedene četiri nove procedure.

Na završnom sastanku koji je danas održan u zgradi Općine Goražde kojem su prisustvovali i Q menadžer Sanid Zirač, te pomoćnici načelnika Općine Goražde potvrđeno je da je Općina Goražde još jednom opravdala certifikat ISO 9001-2008, te da će u završnom izvještaju prema certifikacijskoj kući Bureau Veritas biti predloženo da se produži ovaj certifikat u naredne tri godine.

Eksterni auditor također je ovom prilikom dao određene prijedloge i smjernice za dodatno poboljšanje sistema, te još jednom uputio čestitke na opravdanom certifikatu ISO 9001-2008. kojim je potvrđeno da Općina Goražde posluje u skladu sa najvećim standardima kada je u pitanju javna uprava.



Grb Općine Goražde



Sitna mehanizacija koja je donirana kao pomoć povratnicima

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelsmmed.com
www.eacea.ec.europa.eu



Nova zgrada Općine Gornji Vakuf - Uskoplje

POMOĆ POVRATNICIMA U JAJCE

JAJCE, 13. juni/lipanj – U Jajcu je u petak (13. juna/lipnja) upriličeno svečano uručenje certifikata i izvršena podjela sitne poljoprivredne mehanizacije, stajskih objekata i plastenika za 17 korisnika sa područja općine Jajce. Dio je to projekta „Podrška i pomoć ekonomskom jačanju povratnika“ Federalnog ministarstva raseljenih osoba i izbjeglica i OIC - Fonda za povratak izbjeglica BiH. Svečanosti su prisustvovali Federalni ministar raseljenih osoba i izbjeglica Adil Osmanović, direktor OIC – Fonda za povratak izbjeglica BiH En-Nur Swar Eddahab i Ambasador Republike Indonezije u BiH Nj.E. Subijaksono Sujono.

Goste je pozdravio Edin Hozan Načelnik općine Jajce i u ime korisnika zahvalio se na podršci koja je pružena Jajcu, podsjećajući da Općina Jajce u razvoj poljoprivrede iz budžeta svake godine izdvaja značajna sredstva pa je tako i ove godine u budžetu planirano 350.000 KM za poticaj poljoprivredi.

„Cilj ovog projekta je pružiti podršku i pomoć ekonomskom jačanju povratnika kroz dodjelu grant sredstava od strane Ministarstva i Fonda te uz lično učešće korisnika za nabavku poljoprivredne mehanizacije“ istakao je Ministar raseljenih osoba i izbjeglica FBiH Adil Osmanović i još jednom u ime Vlade FBiH zahvalio Ambasadamama jedanaest zemalja članica Organizacije islamske saradnje (OIC) koje imaju svoja diplomatska predstavništva u BiH na podršci koju pružaju povratnicima kroz Fond.

Vrijednost ovog zajedničkog projekta iznosi blizu milion KM. Fond za povratak izbjeglica BiH - OIC učestvuje u ovom projektu sa 400.000 KM, Ministarstvo raseljenih osoba i izbjeglica sa 300.000 KM i 300.000 KM je participacija korisnika.

Direktor Fonda za povratak izbjeglica BiH - OIC En Nur Swar Eddahaba podsjetio je da je Fond u deset godina postojanja, između ostalog, osigurao i sredstva za oko 440 kuća, deset škola, deset dispanzera i pet domova za mlade.

Projekat se realizira u 17 opština u RS-u i 10 općina u Federaciji BiH i istim je obuhvaćeno gotovo 100 korisnika sitne poljoprivredne mehanizacije, 40 korisnika za stajske objekte i 26 korisnika plastenika.

Vrijednost projekta za Općinu Jajce iznosi 96.000 KM, a za 17 korisnika obezbijeđeno je 8 motokultivatora sa kardanskom prikolicom, 2 motorne kopačice, 4 plastenika površine 100 m² i 3 stajska objekta površine 30 m².

OTVORENA NOVA ZGRADA OPĆINE GORNJI VAKUF-USKOPLJE

U Gornjem Vakufu-Uskoplju četvrtak (12. juna/lipnja) je otvorena nova zgrade općinske uprave. Simboličnim presjecanjem vrpce objekt su zvanično stavili u funkciju načelnik Sead Čaušević i predsjedavajući Općinskog vijeća Marinko Krajina, prenosi Klix.ba.

„Nakon 21. godine građani ove općine dobijaju vlastitu zgradu, kompletnu administraciju na jednom mjestu. Ovdje se nalaze i prostorije Centra za socijalni rad, a zgrada ima i vlastiti parking prostor sa četrdeset mjesta. Ponosan sam, kao i svi drugi koji su doprinijeli na bilo koji način, da smo u ovim teškim vremenima izgradili ovaj prelijepi objekt. Tim više, što znamo da smo općina koja ima mali budžet, čiji se iznos u vrijeme izgradnje kretao 3-4 mil KM, i što za izgradnju ovog objekta nismo koristili kreditna sredstva“, naglasio je Čaušević.

Istakao je, također, da su realizaciju projekta pratile brojne teškoće, poplave 2008. i 2009. i obilne sniježne padavine 2010., koje su prouzrokovale velike materijalne štete na infrastrukturnim i stambenim objektima.

„Porušeni su bili mostovi na rijeci Vrbas, prekinuti vodovodi, uništeno više kilometara putne infrastrukture i pričinjena šteta od preko 4 mil KM, što je iziskivalo izdvajanja budžetskih sredstava za sanaciju navedenih objekata. Uspjeli smo se izboriti sa svim tim nesrećama i započeli izgradnju sportske dvorane, izgradili regulaciju korita rijeke Vrbas u dužini od jednog kilometra, proširili poslovnu zonu za novih deset hektara, asfaltirali više od 30 kilometara makadamskih puteva, sanirali i izgradili više od 20 lokalnih vodovoda, postavili oko 1.200 rasvjetnih mjesta, i realizirali neke druge projekte. Imao sam potrebu da ovo kažem da se ne bi stekao dojam da je izgradnjom ovog objekta stao život u našoj općini. Održali smo fiskalnu stabilnost i nismo nikome dužni“, naglasio je Čaušević.

On se zahvalio Vladi Federacije BiH, koja je u vrijeme premijera Nedžada Brankovića izdvojila 400.000 KM za projekt općinske zgrade, kao i Fondaciji za održivi razvoj OdRaz, koja je za tu namjenu osigurala 200.000 KM.

Preostali dio iznosa do 2 mil KM, kolika je bila ukupna finansijska vrijednost ovog projekta, obezbijedila je Općina Gornji Vakuf-Uskoplje.



VISOKO DOBIJA REZIDENCIJALNO NASELJE NA 40.000 M²



investicija u turizam i privredu, već i zapošljavanje velikog broja Visočana.

„Odlučio sam da jedan dio svojih poslova prebacim u ovu zemlju, odnosno u ovaj grad, Visoko. Da je moja odluka bila ozbiljna potvrđuje i danas položeni kamen temeljac, a na čijem će mjestu za tri godine biti izgrađen novi centar“, kazao je generalni direktor "Abrás company" Ahmed Alabras.

Kako saznaje portal "eKapija.com" od predstavnika kompanije "Abrás company" u Visokom, Kemala Bakovića, u prvoj fazi radova biće izgrađeno 50 vila rezidencijalnog naselja.

Nakon toga, u drugoj fazi, radiće se na platou, na kome će biti smješten restoran, bungalovi (15), bazeni (ženski i muški), fitness sala, tereni za sport. Za sve ljubitelje sportova na otvorenom, tu će se naći tereni za fudbal, košarku, a za kratak predah biće predviđen odmor uz vještačko jezero i park. Na samom platou, kaže Baković, planirano je da se izgradi mini zanatski centar, u kojem bi nastajali svi oni proizvodi specifični za zanatlije iz Visokog. I na kraju, u trećoj fazi, biće izgrađeno 100 kuća za izdavanje.

Cjelokupno naselje prostiraće se na 40.000 m².

U ovaj projekat je do sada uloženo više od 1,5 miliona KM, dok se do okončanja radova očekuje investiranje više od 20 miliona KM. Prednost u izvođenju građevinskih radova bit će data domaćim firmama.



Polaganje kamena temeljca za
rezidencijalno naselje

DELEGACIJA TURSKE OPĆINE SERDIVAN BORAVILA U BREZI



BREZA, 3. juni/lipanj – Na poziv Halila Tuzlića, načelnika Breze, u višednevnoj posjeti ovoj općini Zeničko-dobojskog kantona boravila je delegacija turske općine Serdivan, na čelu sa načelnikom Yusufom Alemdarom. Ideja o bratimljenju između općine Serdivan u Turskoj i općine Breza, pokrenuta je na inicijativu Tuzlića, te je delegacija Brezana boravila u Serdivanu od 10. do 15. decembra 2013. godine. Tokom posjete se razgovaralo o historijskoj povezanosti bošnjačkog i turskog naroda.

U svrhu daljnjeg proširenja i unaprijeđenja ostvarenih prijateljskih odnosa, pristupilo se bratimljenju u slijedećim oblastima: privreda, kultura, školstvo, zdravstvo i sport, u skladu sa Zakonom i principima lokalne samouprave FBiH. O aktuелnoj situaciji na području Breze nakon katastrofalnih poplava, Alemdara je upoznao Tuzlić, a o stanju u poplavljenim naseljima detalje je iznio Huso Herco iz Civilne zaštite. „Želim da izrazim spremnost svoje općine da pomogne u obnovi stradalih područja Breze“, istakao je, prilikom obilaska klizišta i ugroženih mjesta, načelnik Alemdar. Zahvalivši na solidarnosti, Tuzlić je naglasio da je svaka pomoć dragocjena, jer se u Bosni i Hercegovini desila najveća prirodna nesreća u njenoj historiji.

Prema riječima Alemdara Bosna i Hercegovina i Turska su bratske i prijateljske zemlje i mnogo je historijskih veza koje treba obnoviti i razvijati. „Bitna je komunikacija na svim razinama, a posebnu šansu vidimo u povezivanju lokalnih zajednica, kao što je to slučaj sa naše dvije općine“, istakao je načelnik Serdivana. U znak sjećanja na ovaj značajan događaj u historiji dvije, sada već, bratske općine, razmijenjeni su prigodni pokloni.

Načelnik Tuzlić spomenuo je da, uz potencijale sa kojima raspolaže Općina Breza i iskustvo koje posjeduju gosti iz Turske, zasigurno se može stvoriti bolji ambijent za građane Breze, što će u narednom periodu i biti primarni cilj. Delegacije dviju općina položile su i cvijeće na šehidskim mezarjima, sjetivši se onih koji su svoje živote ugradili u temelje BiH.





Grb Općine Jablanica

JABLANICA UVELA VIDEO NADZOR I BEŽIČNI INTERNET U UŽEM GRADSKOM JEZGRU

U skladu sa "Integralnom strategijom razvoja općine Jablanica 2014-2023. godina" Općina Jablanica je uvela video nadzor vider i bežični internet na užem gradskom području, objavljeno je na web stranici Općine Jablanica.

Na osnovu urađenog idejnog i izvedbenog projekta koji je izradila sarajevska firma "Ice Net", na četiri gradske lokacije postavljeno je 8 nadzornih kamera i antene za bežični internet. Besplatni internet će koristiti građani Jablanice ali i turisti u našoj općini koji će, pojedinačno u trajanju od 60 minuta imati na svakih 24 sata, besplatan pristup internetu.

Investitor projekta je Općina Jablanica, a nakon postupka javne nabavke radova izabran je izvođač radova, "Green Line" iz Sarajeva, koji je ovih dana montirao potrebnu opremu. Ukupna vrijednost projekta, video nadzora i bežičnog interneta je 36.872,69 KM.



KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

ODRŽAN PRVI SASTANAK RADNE GRUPE ZA ENERGETSKU EFIKASNOST PRI SAVEZU OPĆINA I GRADOVA FBiH



Savez općina i gradova Federacije Bosne i Hercegovine već duži niz godina surađuje sa GIZ-om na projektima energetske efikasnosti i u okviru te suradnje javila se potreba za formiranjem radne grupe za energetska efikasnost.

Na sjednici Predsjedništva Skupštine Saveza općina i gradova Federacije BiH, održanoj u aprilu/travnju ove godine formirana je Radna grupa za energetska efikasnost, koja je danas (27. juna/lipnja) održala svoj prvi sastanak. Radna grupa će raditi na analizi zakonodavstva iz ove oblasti, izradi prijedloga i razvijanju modela koji će unaprijediti ovu oblast, davati podršku članicama Saveza putem organizacije konferencija, treninga, izradom različitih modela i priručnika. Zatim, Radna grupa će pružati redovne informacije lokalnim zajednicama o postojećim novinama u ovoj oblasti kao i donatorskim sredstvima i fondovima, raditi na podizanju javne svijesti kod stanovništva kroz prigodne edukacije i propagandne programe, podsticati razmjenu iskustava i znanja među članicama Saveza, razvijati mrežu općinskih uposlenika koji se bave ovom tematikom, stvarati zajedničku arhivu propisa i dobrih primjera iz prakse u ovoj oblasti i promovirati energetska efikasnost putem medija i organizacije različitih događaja. Na ovom sastanku radne grupe za energetska efikasnost prisustvovali su i predstavnici iz GIZ-a.

giz





Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Pratite Savez općina i gradova Federacije Bosne i Hercegovine na

YouTube

Pratite Savez općina i gradova FBiH na

g+

facebook
Savez općina i gradova Federacije Bosne i Hercegovine

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

NAJAVA OBILJEŽAVANJA DANA OPĆINA ZA MJESEC JULI / SRPANJ

- **08. juli/srpanj - Dan Općine Tomislavgrad.** Naime, tog datuma 1924. godine položen je kamen temeljac za izgradnju Spomen-bazilike u čast 1000. obljetnice krunidbe prvog hrvatskoga kralja Tomislava. Od 1996. godine ovaj dan se obilježava kao Dan Općine Tomislavgrad.
- **20. juli/srpanj - Dan Općine Stolac** koji je određen povodom blagdana sv. Ilije, zaštitnika grada Stoca.
- **20. juli/srpanj - Dan Općine Kiseljak.** Ovaj datum ima i historijski značaj s obzirom da se u Povelji Bele IV iz 1244. godine spominje da je ovaj kralj 20.07.1244. godine darivao Crkvu sv. Mihovila u Borini. Budući da je to najstariji dokument u kojem se spominje mjesto koje je u užem središtu Kiseljaka, taj dan se obilježava kao Dan Općine Kiseljak.
- **26. juli/srpanj - Dan Općine Domaljevac-Šamac.** Obilježava se kao Dan općine zato što je 26. 07. 1996. godine na svečanoj sjednici Općinskog Vijeća Bosanski Šamac donijeta Odluka o utemeljenju nove općine pod nazivom Općina Domaljevac-Šamac.
- **30. juli/srpanj - Dan Općine Glamoč.** Tog datuma 1941. godine prvi put je oslobođena teritorija Glamoča.
- **31. juli/srpanj Dan Općine Trnovo** i dan oslobođenja Trnova 1992.



Tomislavgrad



Stolac



Domaljevac - Šamac



Glamoč



Trnovo



Kiseljak